

Leestekens

Die leestekenreëls vir [Afrikaans](#) is in hoofstuk 13 van die *Afrikaanse woordelys en spelreëls* (AWS) opgeteken. Hierdie artikel is 'n opsomming van die inligting wat in hoofstuk 13 van die AWS vervat word, met die oogmerk om gebruikers vinnig te help met algemene navrae, maar dit vervang nie die reëls nie. Indien iets hier onduidelik of onvolledig is, kyk in die AWS vir meer leiding.

Wat is die verskil tussen leestekens en skryftekens?

Leestekens help 'n leser om 'n teks te lees en te verstaan. Leestekens soos die komma, aandagstreep en aanhalingstekens dui byvoorbeeld vir 'n leser aan waar sinne eindig, waar 'n parentese begin en eindig en waar die direkte rede van 'n karakter begin en eindig.

Skryftekens, daarteenoor, is deel van die vaste spelling van die woord. Skryftekens soos die deelteken, kappie en koppelteken dui byvoorbeeld aan dat daar 'n nuwe lettergreep in 'n woord is, dat 'n woord op 'n bepaalde manier uitgespreek moet word of dat 'n bousel eintlik 'n samestelling is.

Aandagstreep

Wat is 'n aandagstreep?

Die aandagstreep is 'n strepie wat langer is as 'n koppelteken. In die uitgewerswese word dit 'n "en-streep" genoem. Die Engelse naam daarvoor is 'n "en dash".

Hoe gebruik ons 'n aandagstreep?

Die aandagstreep word met spasies weerskante geskryf. 'n Aandagstreep staan altyd tussen woorde en nooit aan die einde van 'n sin nie.

Waarvoor gebruik ons 'n aandagstreep?

- **Ons gebruik 'n aandagstreep om die aandag op inligting te vestig,**

bv.:

Dis net soos wat ek voorspel het – hy wil nie saamwerk nie.

Dit is belangrik om hard te werk – solank 'n mens net rus ook.

- **Ons gebruik 'n aandagstreep om parenteses van die res van die sin te skei. As die parentese in die middel van die sin is, kom die aandagstreep aan weerskante daarvan. As die parentese aan die einde van die sin is, kom daar net 'n aandagstreep voor die parentese. Die sin word dan met 'n punt of 'n ander leesteken afgesluit, bv.:**

Henry het die hele tyd baklei – en jy weet hoe kan Henry baklei – oor wie voor in die kar mag ry.

Henry het die hele tyd baklei oor wie voor in die kar mag ry – en jy weet hoe kan Henry baklei.

- **Ons gebruik 'n aandagstreep tussen 'n aanhaling en die outeur se naam, bv.:**

“Maak jou vriendelikheid goedkoop en hou jou vriendskap duur.” – [C.J. Langenhoven](#)

Aanhalingstekens

Wat is aanhalingstekens?

Aanhalingstekens is die klein, gekrulde tekens links en regs van 'n bepaalde woord of stukkie teks. Die Engelse naam daarvoor is “quotation marks”.

Hoe gebruik ons aanhalingstekens?

- Aanhalingstekens word altyd as 'n stel gebruik.
- Die eerste aanhalingsteken word links van die betrokke woord of teks geplaas met 'n spasie voor die teken en die eerste woord teenaan die aanhalingsteken. Die aanhaling word gesluit direk ná die laaste woord of leesteken van die aangehaalde teks, met 'n spasie ná die aanhalingsteken.
- Ons gebruik die enkelaanhalingstekens en dubbelaanhalingstekens, maar

dit het verskillende funksies.

- In Afrikaans is die aanhalingstekens altyd bo, nooit onder op die reël nie.
- In Afrikaans krul die aanhalingstekens altyd ondertoe.
- In rekenaargegenereerde tekste kan die gekrulde aanhalingstekens of die reguit strepies gebruik word.



Waarvoor gebruik ons aanhalingstekens?

- Ons gebruik aanhalingstekens om aan te dui dat 'n woord of 'n stuk teks direk aangehaal is. Alles tussen die aanhalingstekens, ook die leestekens moet presies ooreenstem met die aangehaalde teks, bv.:

Malan (1944:63) skryf in sy dagboek: "Die owerhede het ons nie ondersteun nie."

"Die owerhede het ons nie ondersteun nie", skryf Malan in sy dagboek (1944:63).

Die minister het gesê daar is "geen aanduiding" van enige ongerymdheid nie.

- **Ons gebruik dubbelaanhalingstekens om direkte rede aan te dui, bv.:**

Sy skree: "Hier is 'n leeu!"

"Neels, klim in die boom!" gil sy kliphard.

"Watter boom?" vra Neels.

"Die boom daar oorkant," sê sy.

- **Ons gebruik enkelaanhalingstekens om 'n aanhaling binne 'n aanhaling aan te dui, bv.:**

"Ek wou my doodlag," vertel Neels. "Toe hy moes verduidelik wat aangaan, kon hy net 'W-w-wat?!' uitkry."

- **Ons gebruik aanhalingstekens om uitgeligte inligting aan te dui, bv.:**

Gebruik eerder die woord "gretig" as "angstig".

Sy sogenaamde “siekte” het baie vinnig oorgewaai toe hy gehoor het ons gaan swem.

- **Ons gebruik aanhalingstekens om die titels van die onderafdelings van publikasies aan te dui. ’n Boek of ’n tydskrif se titel is byvoorbeeld kursief, maar die hoofstuk of die artikel in die tydskrif se titel is tussen aanhalingstekens, bv.:**

Lees bietjie “Hartlik siek”, die artikel oor hartsiektes in die nuutste *Huisgenoot*.

- **Ons kan aanhalingstekens gebruik om ongestandaardiseerde leenwoorde (woorde wat nog nie in Afrikaanse woordeboeke opgeneem is nie) in ’n teks aan te dui. Dit is nie verpligtend nie, dit hang af van die huisreëls wat vir die betrokke publikasie geld, bv.:**

Dis nou ’n “awesome” idee.

- **In die taalkunde word die enkelaanhalingsteken gebruik om betekenis aan te dui, bv.:**

Die woord “jeens” beteken min of meer ‘teenoor’.



Akuut

Die akuut (ook: “akuutaksent” of “akuutteken”) is ’n klemteken wat na regs oorhel. (Die gravis wat na links oorhel, is ’n skryfteken.). Die Engelse naam daarvoor is “acute accent”.

Hoe gebruik ons die akuut?

- Die akuut word slegs op klinkers geplaas.
- Die akuut verdring nie skryftekens op die klinkers nie. ’n Klinker met ’n kappie of ’n deelteken kry byvoorbeeld nie ’n akuut nie.
- In woorde waar die klem op ’n lettergreep val waarin daar ’n i voorkom, kry die letters langs die i die akuut terwyl die i die kolletjie behou. Die i kry slegs die akuut indien dit die enigste klinker in die beklemtoonde lettergreep is, bv.: *piénk, dráái, díť.*

Waarvoor gebruik ons die akuut?

- Ons gebruik die akuut om aan te dui dat 'n bepaalde lettergreep beklemtoon word, bv. *verståánbaar, móéite, mýne*.
- Sommige woorde word altyd met 'n akuut gespél. Die woord *dié* is 'n sinoniem vir *hierdie*, en in 'n sin soos *Sit op dié stoel, nie daardie een nie* is die akuut verpligtend. As ons die woord *ná* gebruik om aan te dui dat iets na die tyd gebeur, moet die a 'n akuut kry, bv. *Ons gaan ná die fliék ysskaats*.
- Leenwoorde word baie keer met akuut en al uit 'n vreemde taal oorgeneem, bv. *cliché, attaché*. By sulke woorde is dit 'n spelfout om die akuut weg te laat.
- By die bousels *óf ... óf, nóg ... nóg* en *én ... én* is die akuut verpligtend, bv. *Óf jy óf jou suster moet die skottelgoed was*.
- Name van ondernemings word geskryf soos wat die eienaars dit registreer, en name van kinders word geskryf soos wat ouers dit wil skryf. Die gewone reëls vir die akuut hoef nie te geld nie, bv. *Jeanélle Granite, Miáné de Villiers*.

Asterisk

Wat is die asterisk?

Die asterisk is 'n sterretjie. Die Engelse naam daarvoor is ook "asterisk".

Hoe gebruik ons die asterisk?

Ons gebruik die asterisk in die plek van letters wat ons uit woorde weglaat. Elke weggelate letter kry 'n asterisk. Gewoonlik word die klinkers weggelaat.

Waarvoor gebruik ons die asterisk?

- Ons gebruik asteriske as ons om een of ander rede nie 'n woord voluit kan skryf nie, soos woorde wat eintlik taboe is, bv. *Hy is 'n p**ph*l*.
- In die taalkunde dui ons met 'n asterisk voor 'n woord of 'n bousel aan dat dit ongrammatikaal is, bv. *Ons spel dit nie *hius nie*.

Dubbelpunt

Wat is die dubbelpunt?

Die dubbelpunt is twee kolletjies vertikaal oor mekaar. In Engels is dit 'n "colon".

Hoe gebruik ons die dubbelpunt?

- Die dubbelpunt word in lopende teks sonder 'n spasie teen die voorafgaande woord geskryf. Daar is gewoonlik 'n spasie ná die dubbelpunt.
- **Die eerste woord ná die dubbelpunt kry 'n hoofletter as dit die eerste woord in 'n volsin is. As die teks ná die dubbelpunt net 'n sinsdeel of 'n enkelwoord is, kry dit gewoonlik nie 'n hoofletter nie, tensy die woord om ander redes 'n hoofletter moet hê, bv.:**

Daar is 'n goeie rede vir sy afwesigheid: Hy het griep.

Bring die volgende saam: penne, 'n potlood en 'n liniaal.

'n Mens kan hom met een woord beskryf: briljant.

Ons hond het uiteindelik 'n naam: Nala.

Waarvoor gebruik ons die dubbelpunt?

Ons gebruik die dubbelpunt om aan te dui dat die inligting daarna 'n bepaalde verhouding het met die inligting daarvoor. Die verhouding tussen die twee stelling inligting kan een van die volgende wees:

- Dit kan 'n bekendstelling wees waarop daar 'n reeks of lys items volg, bv. *Christo is allergies vir die volgende: aarbeie, neute en pynappel.*
- Die inligting ná die dubbelpunt kan 'n uitbreiding of 'n verduideliking wees van die inligting voor die dubbelpunt, bv. *Hy het net een woord nodig gehad: ja.*
- Die inligting voor die dubbelpunt kan die leser voorberei op 'n aankondiging wat ná die dubbelpunt gemaak word, bv. *Let wel: Beantwoord al die vrae met 'n blou pen.*

Die dubbelpunt word gebruik ná die vertellerteks en voor die direkte rede, bv.

Hanlie gil: "Klim af daar, jy gaan jou nek breek!"

Die dubbelpunt word soms as 'n simbool aangewend, soos by verhoudings (1:3-verhouding), by 'n tyd (12:33), of vir 'n teksvers (23:4; Koran 2:156).

Ellipsteken

Wat is die ellipsteken?

Die ellipsteken (ook: "beletselteken" of "weglaatteken") bestaan uit drie stippels. Dit is 'n fout om meer as drie stippels te gebruik.

Die naam van die leesteken is "ellipsteken", nie "ellips" nie. Die woord "ellips" beteken "weglating", en die ellipsteken word gebruik om die weglating aan te dui, die teken is nie die weglating nie.

Hoe gebruik ons die ellipsteken?

- As die woord voor die ellipsteken voltooi word (m.a.w. die woord word volledig geskryf), kom daar 'n spasie tussen die laaste woord en die ellipsteken, bv. *Jy is nou ...*
- As die woord onderbreek word, skryf ons die ellipsstippels teenaan die woord, bv. *Jy is nou m...*
- As ons die ellipsteken aan die einde van 'n sin gebruik, kry die sin nie nog 'n punt ook nie.
- Ander leestekens, soos die komma, uitroepsteken, vraagteken of aanhalingstekens kan saam met die ellipsteken gebruik word. Sulke leestekens word sonder 'n spasie ná die ellipsteken geskryf.

Waarvoor gebruik ons die ellipsteken?

- Ons gebruik die ellipsteken om aan te dui dat daar 'n langerige pouse is, bv. *Ek weet nie ... Ek bedoel, moet ons nie maar eers toestemming vra nie?*
- Die ellipsteken dui by direkte rede aan dat 'n spreker stotter of in die rede geval word, bv. *Fred sluk. "Ek w-weet n... Nee, hy ..."*
- By aanhalings, bv. in 'n koerantberig of werkstuk, dui die ellipsteken vir die leser aan dat daar inligting of 'n gedeelte van die aangehaalde teks

weggelaat is, bv. *Die minister het gesê dat die lede hulle salarisse ... sal ontvang.*

- Die ellipsteken kan gebruik word in die plek van 'n taboewoord ('n woord wat 'n mens nie eintlik behoort te sê of te skryf nie), bv. *Die leerder het die onderwyser 'n d... genoem.*



Hakies

Wat is hakies?

Daar is vier soorte hakies tot ons beskikking: ronde hakies (), blokhakies [], krulhakies { } en punthakies < >.

Hoe gebruik ons hakies?

- Hakies word altyd in 'n paar gebruik.
- Die hakies moet dieselfde soort wees, maar die eerste hakie en die tweede hakie lyk nie dieselfde nie, want hulle “omarm” die inligting tussen die twee hakies.
- In lopende teks gebruik ons hoofsaaklik ronde hakies.
- Blokhakies word in bepaalde kontekste gebruik, bv. by redaksionele kommentaar.
- Punthakies word in tekste hoofsaaklik gebruik om digitale adresse aan te dui.
- In lopende teks is daar 'n spasie voor die eerste hakie en ná die tweede hakie, en geen spasies tussen die hakies en die teks tussen die hakies nie, bv. *Ek gaan môre (Saterdag) dorp toe.*
- Die beginsel by hakies is dat die inligting tussen die hakies weggelaat moet kan word sonder dat die res van die sin ongrammatikaal word.
- In ander vakgebiede, soos wiskunde en chemie, word die verskillende soorte hakies vir verskillende doeleindes gebruik.

Waarvoor gebruik ons hakies?

- **Ons gebruik ronde hakies om bykomende inligting (soos 'n parentese) in 'n teks aan te dui, bv.:**

Nelia (my stiefsuster) kom kuier.

Hulle woon in Polokwane (voorheen Pietersburg).

- **Ons kan ronde hakies gebruik waar die leser tussen twee moontlikhede kan kies, bv.:**

Stuur die briewe aan die ouer(s).

Vra jou vriend(in) om jou te help.

- Baie verwysingsmetodes vereis die gebruik van ronde hakies, bv. *Holmes (1984:14) beweer dat daar nie gewere gebruik is nie.*

Komma

Wat is die komma?

Die komma is 'n klein teken onder op die reël met 'n bolletjie en 'n stert wat soos 'n 9 na onder krul.

Hoe gebruik ons die komma?

- Die komma kom in die sin voor, nooit reg aan die begin of die einde nie.
- Daar is in lopende teks geen spasie voor die komma nie en een spasie daarna.
- Die komma word ook aangewend as die desimaalteken. In so 'n geval is die komma 'n simbool, nie 'n leesteken nie. Dit is in Afrikaans 'n fout om 'n punt as 'n desimaalteken te gebruik.

Waarvoor gebruik ons die komma?

- Ons skei met die komma tussen gelykwaardige byvoeglike naamwoorde (b.nwe. wat in enige volgorde geskryf kan word), bv. *Die hoof het 'n opwindende, innoverende plan voorgestel* teenoor *Die hoof het 'n oulike nuwe plan voorgestel.*
- Ons skei met die komma tussen items in 'n reeks, buiten waar die voorlaaste en laaste items met voegwoorde geskei word, bv. *Bring genoeg water, eetgoed, skryfbehoeftes en warm klere saam.*
- **Ons skei met die komma tussen die sin en woorde of frases wat**

saam met die sin gebruik word wat nie by die sin geïntegreer is nie, soos tussenwerpsels, aanspreekvorme en einddeelvrae, bv.:

Hoor jy wat ek vir jou sê, Charles?

Genugtig, dis koud vandag.

Jy moet met 'n blou pen skryf, nie waar nie?

- **In lopende teks dui ons 'n parentese of ander uitbreidende inligting (inligting wat weggelaat kan word) hoofsaaklik met kommas aan, bv.:**

Die bom het in Groblersdal, Mpumalanga, ontplof.

Hy swem, en dit nogal vroeg in die oggend, elke dag twintig lengtes.

- **Ons skei tussen 'n sin met onafhanklike sinsvolgorde en bywoordelike bepalings (hetsy woorde of sinsdele) wat aan die begin of einde van die komplekse sin voorkom, bv.:**

Trouens, hy is die beste kandidaat vir die pos.

In elk geval, dis wat ek wil hê.

Ek sal jou help, hoe ook al.

- **Ons gebruik 'n komma om te skei tussen 'n sin met onafhanklike sinsvolgorde en woorde, sinsdele of sinne wat met bywoordelike frases van skakeling of die afkortings daarvan ingelei word, bv.:**

Die meisies kan soetgoed bring, byvoorbeeld kolwyntjies en lekkergoed.

Twee seuns het sertifikate gekry, naamlik Theuns en Bongsi.

- **Ons gebruik 'n komma om in 'n komplekse sin te skei tussen 'n sin met onafhanklike volgorde en 'n sin met afhanklike volgorde wat met 'n voegwoordelike bywoord verbind word, bv.:**

Fred leer hard, dus doen hy goed.

Fred leer glad nie, nietemin doen hy goed.

Fred leer elke dag, daarom doen hy goed.

- **Ons gebruik 'n komma om in 'n komplekse sin te skei tussen 'n hoofsin en die einde van 'n bysin sodat dit duidelik is watter werkwoorde by watter sin pas, bv.:**

Daardie plan wat jy uitgedink het, gaan nie werk nie.

Die oplossing waarmee Danie vorendag gekom het, gaan ook nie werk nie.

Dat hy hard gewerk het, is nie altemit nie.

Omdat hy hard gewerk het, het dit goed gegaan.

Om hard te werk, verg baie deursettingsvermoë.

- **Ons gebruik 'n komma om in 'n komplekse sin te skei tussen 'n hoofsin en die begin van 'n betreklike bysin indien die betreklike bysin 'n parentese is (inligting gee wat weggelaat kan word), bv.:**

Die kinders, wat vanmiddag moet toets skryf, leer hard. (Al die kinders skryf toets en almal leer.) teenoor Die kinders wat vanmiddag moet toets skryf, leer hard. (Sommige kinders skryf toets, net hulle leer.)

- **Ons gebruik 'n komma om in 'n komplekse sin te skei tussen twee sinne met onafhanklike sinsvolgorde wat met 'n neweskikkende voegwoord verbind word, bv.:**

Jeremy eet elke pouse 'n toebroodjie, want hy is honger.

Jeremy eet elke pouse 'n toebroodjie, maar eintlik is hy nie honger nie.

Jeremy eet elke pouse 'n toebroodjie, en hy geniet elke happie daarvan.

Jeremy eet elke pouse 'n toebroodjie, of hy eet vrugte en joghurt.

- **Ons gebruik 'n komma om by dialoog te skei tussen die einde van die direkte rede (voor die aanhalingsteken) en die vertellerteks indien daar nie 'n vraagteken of uitroepteken aan die einde van die direkte rede is nie, bv.:**

“Ek is moeg,” sê Louis.

“Wat maak jy?” vra Louis.

“Gaan weg!” skree Louis.

- **Ons gebruik nie ’n komma ná die aanhef of die groet van ’n brief of ’n e-pos nie, tensy ons die hele boodskap op een reël skryf, bv.:**

Geagte Ouer

XXX

Groete

Mev. H Greyling

Skoolhoof

Hallo Leentjie, kom drink gou saam koffie. Groete, Heilna.



- **Ons gebruik nie ’n komma tussen twee identiese voornaamwoorde wat deel is van dieselfde sin nie, bv.:**

Vra vir Henri-hulle of hulle hulle bagasie gaan haal het.

Kyk nou vir hulle, hulle gedra hulle heeltemal simpel.

Kommapunt

Wat is die kommapunt?

Die kommapunt bestaan uit ’n stippel met ’n komma direk daaronder.

Hoe gebruik ons die kommapunt?

- Ons gebruik die kommapunt in sinne, nooit aan die begin of einde nie.
- Die woord ná die kommapunt kry nie ’n hoofletter nie, tensy die woord in elk geval met ’n hoofletter geskryf word.
- Daar is in lopende teks geen spasie voor die kommapunt nie en een spasie

daarna.

Waarvoor gebruik ons die kommapunt?

Ons kan die kommapunt gebruik om tussen items in 'n reeks te skei. In reekse word die items langs mekaar geskryf. Ons kan ook met kommas tussen reeksitems skei, maar ons gebruik veral kommapunte as die items lank raak, of as dit vir die leser moeilik word om te sien waar die reeksitem begin en eindig, bv.:

Die probleme in daardie gebied word vererger deur die droogte; die plaaslike verteenwoordiger se versuim om na die inwoners se belange om te sien; die inmenging van die Departement van Handel en Nywerheid; en die gebrek aan infrastruktuur.

- **Ons kan die kommapunt gebruik om tussen items in 'n lys te skei. In lyste word die items onder mekaar geskryf. As lysitems bestaan uit enkelwoorde of kort frases, kan ons die lys sonder leestekens maak, of ons kan die items met kommapunte skei. As die lysitems uit sinne bestaan, gebruik ons gewoonlik punte, bv.:**

Bring die volgende saam:

- 'n sonhoed;
- goeie stapskoene;
- 'n pen en papier; en

teenoor

Afmerklys vir die uitstappie:

Bring 'n sonhoed saam, daar is nie skaduwee nie.

Maak seker die skoene wat jy saambring, is gemaklik en ingeloop.

Jy het pen en papier nodig om aantekeninge te maak.

Daar is nie drinkwater nie, bring genoeg.

- **Ons gebruik 'n kommapunt tussen twee sinne waar die voegwoord weggelaat is, bv.:**

Hy is nou opstandig; hy sal later verstaan hoekom dit nodig is.

Sanet is verkies tot hoofmeisie; sy is werklik die beste kandidaat.

- **Ons gebruik nie 'n kommapunt tussen twee sinne wat met 'n voegwoordelike bywoord verbind word nie, tensy die bywoord met 'n komma van die sin afgesonder word en die sin wat daarop volg se volgorde onafhanklik is, bv.:**

Dis warm, daarom gaan Jean-hulle swem.

Dis koud, nietemin gaan Jean-hulle swem.

Dit reën, nogtans gaan Jean-hulle swem.

teenoor

Dis koud; nietemin, Jean-hulle gaan swem.

Dit reën; nogtans, Jean-hulle gaan swem.

Punt

Wat is die punt?

Die punt is 'n enkele stippel.

Hoe gebruik ons die punt?

- Ons gebruik die punt aan die einde van 'n sin.
- Die punt word ook in sommige afkortings gebruik, maar dan is dit deel van die vaste skryfwyse van die afkorting en nie 'n leesteken nie.
- Die punt word sonder 'n spasie teenaan die voorafgaande woord geskryf, met een spasie daarna.

Waarvoor gebruik ons die punt?

- **Ons gebruik die punt om die einde van 'n stelsin aan te dui, bv.:**

Dis my boek hierdie.

Dis koud in die Kaap.

- **Indirekte vrae is in der waarheid stelsinne en word met 'n punt afgesluit, bv.:**

Ek wonder of dit my boek is hierdie.

Chris vra of dit koud is in die Kaap.

- **Ander sinstipes wat as stellings optree, word ook met punte afgesluit. Bevelsinne wat byvoorbeeld eintlik versoeke is, hoef nie uitroeptekens te kry nie. Vraagsinne wat nie vrae is nie, hoef nie vraagtekens te kry nie, bv.:**

Kom sit hier by my, liefie.

Maak bietjie vir my die venster toe, asseblief.

Wie weet, dalk kom hy tog saam.

- **Ons gebruik die punt om tussen items in 'n lys te skei indien die lysitems volsinne is. In lyste word die items onder mekaar geskryf, bv.:**

Afmerklys vir die uitstappie:

Bring 'n sonhoed saam, daar is nie skaduwee nie.

Maak seker die skoene wat jy saambring, is gemaklik en ingeloop.

Jy het pen en papier nodig om aantekeninge te maak.

Daar is nie drinkwater nie, bring genoeg.

- **As die laaste woord van die sin op 'n afkorting eindig wat met 'n punt geskryf word, kry die sin nie nog 'n punt ook nie, bv.:**

Kom koop Saterdag by die rugby sop, tuisgebakte brood, vetkoek, ens.

Heinrich verwerf hierdie jaar sy B.Com.

- **Opskrifte en titels van publikasies kry nie punte nie, bv.:**

Die opkoms van sosialisme

Skuinsstreep

Wat is die skuinsstreep?

Die vorentoeskuinsstreep (ook “solidus”) word as leesteken gebruik. Die skuinsstreep wat agtertoe leun, is gewoonlik deel van bv. internetadresse en word nie hier bespreek nie.

Hoe gebruik ons die skuinsstreep?

- Die spasies voor en ná die [skuinsstreep](#) word bepaal deur die omgewing waarin die skuinsstreep gebruik word. Indien die skuinsstreep tussen twee woorde optree (*dag/nag*) is daar geen spasies nie. Indien die skuinsstreep tussen frases of sinne voorkom, is daar spasies weerskante van die skuinsstreep (*lede teenwoordig / lede afwesig*).
- Die skuinsstreep kan ook 'n skryfteken in sekere leenwoorde wees, bv. in Suid-Afrika se leuse: !ke e: /xarra //ke

Waarvoor gebruik ons die skuinsstreep?

- **Ons gebruik die skuinsstreep om aan te dui dat die leser tussen moontlikhede moet of kan kies, bv.:**

Voeg die suiker/versoeter by die deeg.

Goeiemôre / Dumelang / Good day

Die ouer/voog moet die brief onderteken.

- **Ons gebruik die skuinsstreep om verhoudings tussen begrippe aan te dui, bv.:**

leerder/opvoederverhouding (leerder-tot-opvoederverhouding)

bladsy 17/36 (bladsy sewentien van ses-en-dertig)

puntetelling: 7/10 (puntetelling is sewe uit tien)

R100/dag (eenhonderd rand per dag)

Uitroepteken

Wat is die uitroepteken?

Die uitroepteken bestaan uit 'n regaf strepie met 'n stippel onder. In drukwerk is die regaf strepie dikker bo en dunner onder.

Hoe gebruik ons die uitroepteken?

- Ons gebruik die uitroepteken hoofsaaklik aan die einde van sinne. As daar 'n uitroepteken aan die einde van 'n sin staan, kom daar nie nog 'n punt ook nie, bv. *Klim uit!*
- Indien die direkte rede met 'n uitroepteken afgesluit word, kry die vertellerteks wat daarop volg nie 'n hoofletter nie, bv. "*Bly stil!*" skree sy.
- Ons kan die uitroepteken ook in parentesies gebruik, dan dui dit nie noodwendig die einde van 'n sin aan nie en hoef die volgende woord nie 'n hoofletter te hê nie, bv. *Jy lieg - al weer! - vir my.*
- Tussen interne dialoog (dit is 'n gesprek wat 'n karakter in sy of haar kop voer en nie hardop sê nie) en die vertellerteks, kan die uitroepteken die komma vervang, bv. *Moenie! skree sy gesonde verstand.*
- Die uitroepteken word gewoonlik teenaan die voorafgaande woord of leesteken geskryf, met 'n spasie agterna, tensy daar nog 'n leesteken op die uitroepteken volg, bv. "*Moenie so skree nie!*"
- Dit is aanvaarbaar om die uitroepteken saam met die vraagteken te gebruik om verontwaardiging of ongeloof uit te druk. Die vraagteken word eerste geplaas, bv. *Jy het wat gedoen?!*
- Dit is aanvaarbaar om meer as een uitroepteken ná mekaar te gebruik, maar pasop om dit te veel te gebruik, want dan gaan die effek verlore, bv. *Ag man, gaan bars!!!!*
- Die uitroepteken is nooit verpligtend nie. Uitroepsinne kry gewoonlik uitroeptekens, maar selfs dan bepaal die konteks of die uitroepteken gepas is. As 'n mens vir 'n hond sê *sit* vereis dit waarskynlik 'n uitroepteken. As 'n mens vir 'n gas sê *sit* is 'n uitroepteken nie gepas nie.

Waarvoor gebruik ons die uitroepteken?

- **Ons gebruik die uitroepteken om aan te dui dat iets hard uitgespreek word, soos wanneer die spreker skree, bv.:**

Moenie!

“Nee!” gil sy.

- **Ons gebruik die uitroepteken om aan te dui dat ’n sterk emosie of ’n gesindheid uitgedruk word, bv.:**

“Aggenee, Mariet, ek is so verskriklik jammer!”

Hy het soos ’n groot speld verdwyn, en daar sit ek toe met die gebakte pere!

Die simpel vent is mos altyd “onskuldig”, intussen lieg hy as hy sy bek oopmaak!

Voertsek!

Fantastiese nuus!

Vraagteken

Wat is die vraagteken?

Die vraagteken is ’n krulteken met ’n stippel daaronder.

Hoe gebruik ons die vraagteken?

- Die vraagteken staan gewoonlik aan die einde van die sin.
- As die sin met ’n vraagteken afgesluit word, kry dit nie nog ’n punt ook nie.
- By parentesies kan die vraagteken die parentese afsluit, en dan is dit nie noodwendig die einde van die sin nie, bv. *Dis die waarheid - en vertel hy dan nie altyd die waarheid nie? - wat ons daardie aand gehoor het.*
- Tussen interne dialoog (dit is ’n gesprek wat ’n karakter in sy of haar kop voer en nie hardop sê nie) en die vertellerteks, kan die vraagteken die komma vervang, bv. *Hoekom? vra sy haarself af.*
- Die vraagteken kan saam met die uitroepteken gebruik word om verbasing of verontwaardiging uit te druk. In so ’n geval staan die vraagteken eerste, bv. *Wie dink jy is jy?!*
- Die vraagteken word teenaan die voorafgaande woord geskryf, met ’n spasie agterna.

Waarvoor gebruik ons die vraagteken?

- **Ons gebruik die vraagteken om vrae mee af te sluit, bv.:**

Wat het gebeur?

“Wat het gebeur?” vra sy.

Jy het wat gesê?

Jy kom vanaand oorslaap, nè?

- **Indirekte vrae is nie vrae nie, dit is stellings en word nie met vraagtekens afgesluit nie, bv.:**

Hy vra wat gebeur het.

Sy vra of jy vanaand kom oorslaap.



Lees hierdie artikels om nog meer te leer

- [Sinsleer](#)
- [Skuinsstreep](#)
- [Simplekse en komplekse sinne](#)
- [Klankleer](#)
- [Woordsoorte](#)
- [Klankgrepe en lettergrepe](#)